

## TESTIMONIATGES

### Lo Primièr Capiscòl del GRELH ROERGÀS

*Lo 6 de març 1921 se décidiguèt a Rodés la fondacion del GRELH ROERGÀS. Eron aquí Enric MOULY, BRUNET, Prèssident de la Societat de las Letras, BOIÈR de Cabanés, GUIBÈRT del Gua, Edoard GALY, MARRA de Cranton de Compolibat, Enric BEDEL, Paul ANDRIEU de Colombiès, COUBÈS Felic mètstre d'escòla a Canet-de-Salars, Renat FLOTAS mètstre d'escòla a Lavèrnha de Naucèla, CLARMONT professor a l'Escòla Normala, Josèp VAYLET d'Espalion. Los estatuts de la Societat foguèron redigits puèi l'òm cerquèt un Prèssident. Mouly conta :*

Se discutiguèt tot un moment per saupre qual tendriá la barra de la Societat. Cap dels presents se vesí pas a la presidença. Alèra, M. MARRA e M. BRUNET gitèron lo nom del canonge VAYLET, aumornièr del Licèu, letrut e fin poèta, autor de polidas cançons en lenga nòstra, grand amic de BESSOU e de la mèma promocion qu'el. Veniá de far paréisser un libron sus la vida e sur l'òbra de son camarada. Tant de qualitats farián d'el un president d'attaca. S'agissiá qu'acceptèsse. Mas en z'o li presentant coma cal, refusariá pas aquel onor, n'èran segurs, èra tròp brave !

Ósca ! lo Burèu èra quilhat d'aplomb !

Enric MOULY  
*En tuant lo GRELH*

### L'Aumornièr saludat per sos escolans

*Lo jorn que li espillèron la crotz de la Legion d'Onor, en genièr de 1930, un èlève li legiguèt aquel poèma :*

Dins aquel vièlh ostal, ont de mèstres aimats  
Nos dison la bèutat de Cornelha e Vergèli,  
Avètz pres doçament nòstres còrs de mainats  
Per li plan semenar lo gran del Evangèli.  
Mètstre, sièretz un brave e bon semenador.  
Se lo gran a frosat e se l'espiga es plena,  
Remerciànt lo Senhor, lo bèl trabalhador  
Se repausa lo ser, siaud e l'ama serena.  
Aital faretz ; mas uèi ausissètz fremesir  
Tot vòstre vièlh Licèu, en gau en aquest'ora  
De vos veire a l'onor. Fièrs fintam trelusir  
Sus vòstre còr valent, la bèla flor porpora.